

GLESIE FURLANE

di pre CHECO PLACEREAN

No si trate, fevelant di « glesie furlane », di un mût di dî par savê là che si cjate une purizion gjeografiche de glesie catoliche, tant che si tratass di une provincie di un stât centralisât — uso chel talian o chel francês — e no si trate nancje di un mût di dî ch'al vâl dome pe glesie furlane, ma par dutis lis glesiis che si cjatin dacordo te fede, te sperance e te caritât di Crist: al ven a stai che la glesie di Crist a jè une comunion di vite sul stamp di chel di une famèe, cun tantis sûrs e fradis, ch'a si cjatin insieme ma ch'a riscjn tant di vê la filusumie compagne che diferente, pur restant de stesse cjoce e cu lis stessis lidrîs.

Chì, però, no vulìn tocjâ il cantìn teologjic sul cont de glesie, come ch'a disin, « locâl » e di chê universâl: no si trate di robe ch'a vali pôc, ansit: ma o fasin cont che chei ch'a nus lein a' setin dacordo.

Stant a ce che si dîs e che si lei, duc', in fonz, a no dinein nì la prime nì la seconde, ancje se la seconde, masse voltis, e finiss cul roseâ la prime, che tai nestris timps 'e tente di cjapâ fuarce par judânus a saltâ fûr di une glesie universâl tal sens, in pratiche, di un imperi ch'al governe e ch'al controle dut cu la çate dai siei governadôrs, prefez o vescui ch'a setin.

Duncje, o disevin che par nô a esist ancje la glesie furlane:

- no parvie che al covente ancje in Friûl un ch'al ministri j afârs de glesie universâl;
- ma parvie che al esist un popul (se cualchidun si suste, si po' ancje dî « comunitât naturâl »!) furlan.

Si trate di chest: la fede di Crist e fâs dut-une di chei ch'a crodin, cun Crist, ansit cu la Trinitât, ma « chenti », in te storie da l'umanitât, la fede a reste levan de paste; un pan dome di levan nissun lu tache, e un pan cence levan al è rude croste.

Fûr di paragon, lis comunitâz, j popui, ju plante, ju manten e ju strucje la storie dai umign: la glesie locâl, ven a stai chês comunitâz e chei popui cun intorsi il levan de fede, de sperance e de caritât di Crist, ch'a furducjn par fâ jevâ, fâur cjapâ la figure e la filusumie dal Crist, cun etâz diferentis, mûsis diferentis, fint ch'al torne a fânus Lui madressi dal dut.

A chest pont nus tocje meti in file lis resons par dî che in Friûl a esist une glesie furlane.

- 1) La glesie di Aquilèe a jè tant di Diu antighe ch'e à podût nassi la tradizion di S. Ermacure, mandât dal apuestul Pieri (che nol veve timp di vignî fin cassù) (1), a metile in pîs e a fâ di vescul.
- 2) Chê stesse glesie e à metudis lidrîs tant siguris — nomenìn dome Cromazi, Jaroni, Rufin cun tanc' âtris — di frontâsi ancje cuintri Rome par restâ salde te fede vude dai apuestui e tignude cont cence lasâle smamî o pierdisi: o fevelin dal afâr dai « Tre Cjapitui », ch'a jàn dade l'ultime man par ch'al nasses il Patriarcjât di Aquilèe.
- 3) La stesse idèe e plui la storie di un Patriarcjât no dome a conferme ch'o sin une glesie locâl — sul tipo di chês di Alessandrie, di Antiochie, di Costantinopoli e di Rome — ma ancjemò di plui: mari di glesiis locâls.
- 4) Al covente žontâ che nô j diventin furlans propit dal grim dai Patriarcjs medievâi, nestris vescui e sorestanz civî. Plui glesie locâl di cussì no crôt ch'a si 'n' cjati!

Po', par resons pulitichis e di torneconz, un pape (Benedet XIV) al à butât jù il nestri Patriarcjât, al ven a staj l'unitât glesiastiche dal popul furlan, dividintnus glesiasticamentri come ch'o si cjatìn in di di uè fra Udin e Gurisse, e slontanant di Aquilèe la diocesi di Concuardie, che de ete romane in cà a ere stade come la prime fie, cun chê di Žui, dal Patriarcjât.

Si pò pensâ ch'al sei stât fat par rabie, no sopuartant Rome un patriarcjât diferent dal so tal Ocident, o ancje dome come ch'al sucêt ai parons, che nancje no s'insumìn che ur sevi improibît di fâ alc.

O crodìn necessari dî ch'al è l'unic câs che il pape al vebi abolît un Patriarcjât no dome di onôr!

Poben, e àn fruçade l'unitât glesiastiche furlane ch'a' son plui di dusinte agns, ma il popul furlan, la comunitât di vite, di sintî, di patî, di fevelâ dai furlans no jè muarte.

Nô o pensìn ch'al sevi plui che just tornâ a repeçâ l'unitât glesieastiche dai furlans:

— no pal gust di tornâ a fâ lusî ce ch'al è passât (cualchidun, par tacâ, al vores fâvus dî ch'o vebin di tornâ indaûr te storie: al è comut in-

(1) Al scugnive fermâsi a Vignesie (n.d.r.)!

ventâ il contrari), ma parceche il prisint al à intorsi ancjemò tant di chel passât. Se no tegnin cont di chest, al è sigûr che si dopre la glesie par cjastiâ i popui, tal nestri câs un popul (il Furlan) ch' j à crodût e glesie fin cumò, ancje se, par dî il vêr, e à savût jessi triste cun lui.

— Parceche al à di jessi tant clâr di podêlu tocjâ cu la man, che la glesie no met il pît sul cuel a nissun popul, par doprâlu come une cavalete par un âtri; no lu divît par fâj pierdi il so savôr e cussì domâlu plui ben.

Al è par chest ch'o sin restâs malapajâz dal discors di pape Pauli a Udin, in place, in che dî dal Congres Eucaristic, che no si è indegnât nancje di nomenânus, e che no molin de vêse a mâl cui sorestanz de cunvigne eucaristiche, dal diretôr (bons. Milio Pizzon) in jù, ch'e à fevelât di dut, ma mai de glesie furlane.

O pénsino che si puedi predicjâ il vanseli a un popul cence rispietâ il so jessi e la sô storie, ma cirint di sgrifignâj l'anime ch'al à intorsi, come se par crodi a Crist coventass no jessi ce che si è?

No si trate, no, di piniis ma di sostanse! Almancul denant di Crist e di chê che vares di jessi la sô sponse, la Glesie, duc' j popui a valin compagn. Come cristians no volin vê nuje cuintri i Veniz o i Talians o âtris, ma si scuen viodisi butâz te scovacere cuant che ti dan dongje cui Veniz te « Conferenza Episcopale Veneta », ancje se la Serenissime a jè muarte agnorums indaûr; almancul il stât talian al è ancjemò in pîs (Conferenza Episcopale Italiana).

Alore, esal masse pratindi che si torni a plantâ une unitât di glesie furlane, magari cun tune « Conferense Episcopâl Furlane », come ch'a doprin cumò?

No tignînt di voli chestis robis ch'a nus tocjn plui insot di ce ch'al pò semeâ, par vie che si ûl slargjâ l'ôr dal cîl (orizzonte), o scugnînt dî che si riscje di lâ tant in sù di no viodi clâr cajù.

Cun tune peraule moderne, o diventin astraz e, par jessi duc', o diventin nissun. Ven a staj, il contrari di universâl!